

## Morning Dogri (NSD) National News Bulletin 26-04-2024

### आकाशवाणी

- लोकसभा चुनावं दे दुए गेड़ तैह्त मतदान शुरू, मध्यप्रदेश दी बेतुल संसदीय सीट पर मतदान हुन त्रिये गेड़ च होग।
- लोकसभा चुनावं दे चौथे गेड़ तैह्त नामांकन पत्रें दी जांच पड़ताल अज्ज होग।
- प्रधानमंत्री नरेन्द्र मोदी होर एनडीए मेदवार दे समर्थन च अज्ज बिहार च दऊं जनसभाएं गी संबोधत करगंन।
- लोकसभा चुनावं दे 5में गेड़ लेई मतदान 20 मई गी होग।
- कोरिया दी चैगवान थाहर खेड्डी जा'रदी विश्व नशानेबाजी पैरा खेड्ड प्रतियोगिता च महिला 10 मीटर एयर रैफल मकाबले च भारत दे पैरा नशानेबाज मोना अग्रवाल नै सुन्ने दा तगमा जित्तेआ ऐ।



### 2<sup>nd</sup> Phase

केन्द्री राज प्रबंध आले इलाके जम्मू कश्मीर सनें 12 राज्यें च फैली दिएं 88 संसदीय सीटें च अज्ज लोकसभा चुनावं दे दुए गेड़ तैह्त वोट पोआए जा'रदे न। जिनें सीटें पर मतदान होआ'रदा ऐ उंदे च केरल दी सब्बै 20 सीटां, कर्नाटक दी 14, राजस्थान दी 13, उत्तर प्रदेश ते महाराष्ट्र दी 8-8, मध्यप्रदेश दी 6, असम ते बिहार दी 5-5, पच्छिम बंगाल ते छत्तीसगढ़ दी 3-3 ते मणिपुर, त्रिपुरा ते जम्मू कश्मीर दी 1-1 सीट शामिल ऐ। मध्यप्रदेश दी बेतुल लोकसभा सीट पर बीएसपी दे मेदवार दा काल होई जाने करी उत्थें मतदान गी अगड़ा पाई दित्ता गेआ ऐ। उत्थें मतदान हुन त्रिए गेड़ च होग। इस गेड़ च कुल 1 ज्हार 202 मेदवार चुनां लड़ा'रदे न। मतदान बडलै 7 बजे शुरू होई गेदा ऐ ते संजा 6 बजे समाप्त होग। 16 लक्ख थमां बद्ध पोलिंग अफसर 1 लक्ख 62 ज्हार मतदान केन्द्रें च 15 करोड़ 88 लक्ख मतदाताएं दे सुआगत लेई तैआर न। इस गेड़ तैह्त 34 लक्ख 8 ज्हार मतदाता पैहली बारी अपने वोट दे अधिकार दा इस्तेमाल करगंन।

इस गेड़ तैहत केई बड्डे नेताएं दे चुनावी भविक्ख दा फैसला होग जेहदे च वायनाड थमां सीपीआई दी ऐनी राजा ते कांग्रेस दे राहुल गांधी तिरुवनथपुरम थमां केन्द्री मंत्री राजीव चन्द्रशेखर ते कांग्रेस दे शशि थरूर, बैगलुरू दक्खन थमां बीजेपी दे तेजस्वी सूर्या, मथुरा थमां बीजेपी दी हैमा मालिनी, मेरठ थमां बीजेपी दे अरूण गोविल, मांडया थमां कर्नाटक दे साबका मुख्मन्त्री एच.डी.कुमारस्वामी ते पूर्णिया थमां पप्पु यादव शामिल न। अज्ज राजस्थान दी 25एं थमां 13 लोकसभा सीटें उप्पर मतदान होग। बिहार दी 5, किशंगंज कटियार पूर्णिया, भागलपुर ते बांका लोक सभा सीटें पर मतदान होग।

<><><><><><>

### **Polls-4<sup>th</sup> Phase**

लोकसभा चुनां दे चौथे लेई नामांकन भरने आला कम्म कल सम्पन्न होई गेआ। नामांकन पत्रेंदी जांच आला कम्म अज्ज कीता जाग ते मेदवार जेकर चाहन तां 29 अप्रैल तगर अपने नां वापस परताई सकदे न। अगले म्हीने दी 13 तरीक गी 9 राज्यें ते केन्द्र शासत प्रदेश दी 96 लोकसभा सीटें लेई मतदान होना ऐ।

<><><><><><>

### **PM**

भातरजी जनता पार्टी दे वरिष्ठ नेता ते प्रधानमंत्री नरेन्द्र मोदी होर अज्ज बिहार च एनडीए मेदवारें दे समर्थन च 2 जनसभाएं गी संबोधत करगंन। पैहली रैली ओह अरारिया संसदीय क्षेत्र च फारबिसगंज हवाई अड्डा मैदान च करगंन जिसलै कि दूई रैली ओह मुगर संसदीय क्षेत्र दे सफियासराय हवाई अड्डा मैदान च करगंन। प्रधानमंत्री हुंदे कार्यक्रम गी दिक्खदे होई सुरक्षा दे पुख्ता बंदोबस्त कीते गेदे न।

<><><><><><>

### **PM Appeal**

प्रधानमंत्री नरेन्द्र मोदी होरें अज्ज लोकसभा चुनां दे दुए गेड़ च लोकें थमां खरी मती ते रिकार्ड गिनतरी च मतदान करने दी अपील कीती ऐ।

इक सोशल मीडिया पोस्ट च प्रधानमंत्री होरें युवाएं ते महिला मतदाताएं थमां बड़ी मती गिनतरी च मतदान केन्द्रें पर औने दा आग्रह कीता। उनें आखेआ जे मता मतदान फीसद मुल्ख दे लोकतंत्र गी मजबूत करदा ऐ।



### **PM Modi-Summit**

प्रधानमंत्री नरेन्द्र मोदी होरें इटली दी प्रधानमंत्री जियोर्जिया मेलोनी हुंदे कन्ने फोन पर गल्ल कीती ते जून च होने आले जी-7 शिखर सम्मेलन च उनेंगी साद्दा देने लेई धन्नबाद कीता।



### **LS-Poll 5<sup>th</sup> Phase**

लोकसभा दे 5में गेड़ दे चुनां लेई अज्ज अधिसूचना जारी करी दित्ती गई ऐ। इस गेड़ तैहत 6 राज्यें ते दऊं केन्द्र शासत प्रदेशें दिएं कुल 49 लोकसभा सीटें लेई मतदान होग। इंदे च उत्तर प्रदेश दियां 14, महाराष्ट्र दियां 13, पच्छिम बंगाल दियां 7, ओडिशा ते बिहार दियां 5-5, झारखंड दियां 3 सीटां ते जम्मू कश्मीर ते लद्दाख दी 1-1 सीट शामिल ऐ। इस गेड़ लेई नामजदगी आले कागद-पत्र 3 मई तगर जमा करोआए जाई सकदे न। इस गेड़ लेई मतदान 20 मई गी मतदान होग। ओडिशा च असैंबली दे दुए गेड़ दे चुनां लेई बी अज्ज अधिसूचना जारी होई गई ऐ।



### **SC-EVM VVPAT**

सुप्रीम कोर्ट इलैक्ट्रानिक वोटिंग मशीनें ईवीएम च दर्ज वोटें दा वोटर वैरिफिकेशन पेपर ऑडिट ट्रेल यानि वीवीपीएटी पर्विणं कन्ने सौ फीसद करने दी मंग करने आली याचिकाएं पर अपना फैसला सनाग। न्यायमूर्ति संजीव खन्ना ते न्यायमूर्ति दिपांकर दत्ता हुंदी पीठ नै दो दिनें दी व्यापक सुनवाई मगरा 18 अप्रैल गी एसोसिएशन ऑफ डैमोक्रेटिक रिफार्म्स-एडीआर सनें केई याचिकाएं पर अपना फैसला सुरक्षत रक्खेआ हा। उस्सै रोज 24 अप्रैल गी मामले दी सुनवाई आस्तै फैसला सुरक्षत रखी लैता गेआ।

24 अप्रैल गी अदालत नै अपने फैसले पर रोक लाई दित्ती ते किश मुद्दें पर चुनां आयोग थमां होर स्पष्टीकरण मंगेआ। सुनवाई दरान पीठ नै चुनां आयोग थमां ईवीएम ते वीवीपीएटी दी कार्यप्रणाली ते उंदी सुरक्षा सुविधाएं बारे पुच्छेआ हा।

<><><><><><>

## Para Shooting

पैरा नशानेबाजी च भारतीय पैरा नशानेबाज मोना अग्रवाल नै कल रातीं कोरिया दे चंगवॉन च विश्व नशानेबाजी पैरा स्पोर्ट मकाबले च महिलाएं दे 10 मीटर एयर रैफल मकाबले च सुन्ने दा तगमा जित्तेआ। फ उर्थें गै सेना दे आमिर अहमद भट्ट नै 25 मीटर पिस्टल मकाबले च चांदी दा तगमा जित्तेआ। 37 बरें दी मोना अग्रवाल होरें फाइनल च आर2-10 मीटर एयर रैफल मकाबले च 250.8 अंक हासल करियै सुन्ने दा तगमा हासल कीता।

<><><><><><>

## IPL

आईपीएल क्रिकेट च रॉयल चैलेंजर्स बेंगलोर नै कल रातीं हैदराबाद दे राजीव गांधी इंटरनेशनल स्टेडियम च खेड्डे गेदे मैच च सनराईजर्स हैदराबाद गी 35 रंजें कन्नै हराई दित्ता। 207 रंजें दे लक्ष्य दा पिच्छा करदे होई सनराईजर्स हैदराबाद तैह 20 ओवरें च 8 विकटें दे नुक्सान पर 171 रंज पर गै सिमटी गई।

<><><><><><>

## Asian U-20 Athletics

एथलैटिक्स च भारतीय एथलीटें 21मीं एशियाई अंडर-20 एथलैटिक्स चैंपियनशिप च मर्दे ते महिलाएं दी 3 ज्हार मीटर स्टीपलचेस मकाबले च अपना दबदबा बनाया ते दुबई च दुए दिन कल सुन्ने दे तगमें दी गिनतरी त्रै तगर पजाई दित्ती। एकता डे नै महिलाएं दी 3 ज्हार मीटर स्टीपलचेज च सुन्ने दा तगमा हासल कीता, जिसलै के मर्दे दी प्रतियोगिता च रणवीर सिंह जेत्तू रेह ते सुन्ने दा तगमा हासल कीता।

एहदे थमां पैहले अनुराग सिंह कलेर नै मर्दे दे शॉट-पुट मकाबले च सुन्ने दा तगमा  
जित्तेआ।फ कुल मलाइयै भारतीय एथलीटें 7 तगमें जित्ते।

<><><><><><>